

INUIT ATAQATIGIIT

Inatsisartuni



02. juli 2019

UKA2019/138

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Kinguaassiuutitigut meeqqanik atornerluisoqarsimatillugu
pineqaatissiisarnerup sakkortusinissaanik Nunatsinni
unnerluussisussaataasut kaammattorneqarnissaat siunertaralugu
Naalagaaffeqatigiinnermi oqartussaasut saaffigineqarnissaannik
Naalakkersuisut peqquneqarnissaannik Inatsisartut
aalajangiiffigisassaattut siunnersuut.**

(Inatsisartunut Ilaasortaq Sofia Geisler, Inuit Ataqatigiit)

Tungavilersuut:

Kinguaassiuutitigut atornerluinerit kanngutsaatsuliornerillu ajoraluartumik annertuumik pisartut pissutigalugit ajornartorsiutit annertuut nunatsinni atugaralutigit nassuerutigalugu pineqaatissiinerit piaartumik sakkortusineqartariaqartut isumaqarpunga.

Unioqqutitsinerit taamaattut pinaveersaartinnissaannik inatsimillu unioqqutitsinerit kingunerisaasa minnerpaaffilernissaannut inuiaqatigiinni sulianut ingerlanneqareersunut pineqaatissiinerit sakkortusineqarnerat tapertaassaaq.

Ajornartorsiutit Politimesterip ukiumoortumik nalunaarutaatigut kisitsisinngorlutik aamma ersertartut imaluunniit isumaginninnermi suliassanngortartut eqqarsaatigalugit siunnersuuteqartut eqqumaffigilluinnarpara sakkortunerusumik pineqaatissiineq immi kisimi aaqqiissutaasinnaangitsoq. Suliat eqqaaneqartut tamakku kinguaassiuutitigut atornerluinerit pisortat annertuumik iliuuseqartariaqalerannik pisariaqartitsilersarput, inuppassuarnillu tamanna kalluaasarpoq.

Pineqaatiissinerit sakkortusineqarnerisigut qularinngilluinnarpara inuiaqatigiittut takutissagipput kinguaassiuutitigut meeqqat atornerlunneqartarnerat pinerluuteqarnertut imaannaangitsorujussuurtut, naleqartitatsinnillu innarliinertut akuerineqarsinnaangilluinnartut, isigipput.

Kinguaassiuutitigut atornerluinerit sulluunniit iliuusaapput akuerineqarsinnaangitsut pisussaangitsutut isigisariaqakkagut. Meeqqalli

tassaapput imminnut illersorsinnaasangitsut eriajisassat, inuiaqatigiinniillu illersorneqarnissaminnik immikkut pisariaqartitsisut. Kinguaassiuutitigut atornerluinerit meeqqanut tutsinneqarpata tamatumunnga pineqaatissiineq allanut sanilliullugu malugineqarsinnaasumik sakkortunerusariaqarpoq.

Pineqaatissiineq qanoq imaqassanersoq eqqartuussivitsigut aalajangersarneqartarpoq, eqqartuussivitsigulli aalajangiinerit ersersikkajuttarpaat suliassanut aalajangersimasunut tunngatillugu pineqaatissiinnerit qanoq inissisimanissaannik unnerluussisussaataasut innersuussinerat. Siusinnerusukkut suliani aalajangersimasuni pineqaatissiinissamik innersuussinerit unnerluussisussaataasunit saqqummiunneqartut sakkortunerusumik imaqatartut takusareerparput, tassalu pineqaatissiinerup imarisassaatur unnerluussisusaataasut siusinnerusukkut innersuussutigisarsimasaat innuttaasut inatsisunik illersorneqartutut misigisimanerannut naapertuukkunnaarsimanagerat pissutigalugu pineqaatissiineq sakkortunerulissasoq unnerluussisussaataasunit innersuunneqartarluni.

Isumaga naapertorlugu kinguaassiuutitigut meeqqanik atornerluisoqarsimatillugu pineqaatissiinerit eqqarsaatigissagaanni, innuttaasut inatsisunik illersorneqarnerminnut misigisimanerannut tamanna sanilliullu naapertuukkunnaarsimavoq.

Neriuppunga siunnersuutiga paasineqarluni akuersaarneqassasoq.

Aningaasatigut allaffissornikkullu pisortanut kingunerisassai:

Naalakkersuisunit Naalagaaffeqatigiinnermi Oqartussaasut attaveqarfiginissaannut allaffissornikkut atorfissaqartinneqartup ukiumut atorfeqartinneqartup AC-ip 1/12-deliata nalinga qaangernaviannigikkaa naatsorsuutigineqarpoq.

Aningaasatigut allaffissornikkullu namminersortunut kingunerisassai:

Soqanngilaq.

Aningaasatigut allaffissornikkullu innuttaasunut kingunissai:

Soqanngilaq.